

# Offerynnau Statudol sydd ag Adroddiadau Clir 15 Gorffennaf 2019

## SL(5)429 – Rheoliadau'r Gwasanaeth Iechyd Gwladol (Ffioedd Ymwelwyr Tramor) (Diwygio) (Cymru) (Ymadael â'r UE) 2019

### **Gweithdrefn: Negyddol**

---

Mae'r Rheoliadau hyn yn diwygio Rheoliadau'r Gwasanaeth Iechyd Gwladol (Ffioedd Ymwelwyr Tramor) 1989 (SI 1989/306) (y Prif Reoliadau).

Mae'r Prif Reoliadau yn caniatáu i Fyrddau Iechyd Lleol yng Nghymru adennill ffioedd gan ymwelwyr tramor nad ydynt yn preswyllo fel arfer yn y Deyrnas Unedig (DU) am gategoriâu penodol o ofal iechyd a ddarperir iddynt yng Nghymru, oni bai fod yr ymwelydd tramor, neu'r gwasanaeth y mae'n ei dderbyn, yn destun esemptiad.

Mae'r Rheoliadau hyn yn cael eu gwneud o dan adran 124 o Ddeddf y Gwasanaeth Iechyd Gwladol (Cymru) 2006 (Deddf 2006) sy'n rhoi pŵer i Weinidogion Cymru wneud rheoliadau ar gyfer codi ac adennill ffioedd gan bersonau nad ydynt yn preswyllo fel arfer ym Mhrydain Fawr am wasanaethau'r GIG. Maent hefyd yn cael eu gwneud o dan adran 203(9) a (10) o Ddeddf 2006.

Bydd y Rheoliadau yn cywiro cyfeiriadau at gyfraith yr UE a ddaw'n anweithredadwy ar ôl i'r DU ymadael â'r UE ac yn gwneud darpariaeth ar statws ymwelwyr o Wladwriaethau'r Ardal Economaidd Ewropeaidd (AEE) a'r Swistir o ran talu ffioedd am ddefnyddio gwasanaethau'r GIG yng Nghymru pe bai'r DU yn ymadael â'r UE heb gytundeb. Bydd y diwygiadau yn sicrhau bod categorïau penodol o ymwelwyr o Wladwriaethau'r UE/AEE a'r Swistir yn parhau wedi'u hesemptio rhag talu ffioedd am ofal penodol y GIG. Mae'r diwygiadau'n ofynnol hefyd i gynnal yr esemptiadau presennol yn y Prif Reoliadau yn dilyn gwneud Rheoliadau Cyd-drefnu Nawdd Cymdeithasol (Gofal Iechyd Cilyddol) (Diwygio etc.) (Ymadael â'r DU) 2019 (SI 2019/776).



Mae'r Rheoliadau'n darparu fel a ganlyn:

- Cadw'r hawl bresennol i unigolion sy'n preswyllo fel arfer yng Ngwladwriaethau'r AEE neu'r Swistir i dderbyn gofal y GIG heb dalu ffioedd os bydd ganddynt ddogfen gofal iechyd cilyddol a ddyroddir gan y DU ar y diwrnod ymadael neu os byddent wedi bod yn gymwys i gael dogfen o'r fath pe bai'r rheolau a oedd yn gymwys cyn y diwrnod ymadael heb newid.
- Darparu esemptiad rhag ffioedd am driniaeth y mae'r angen amdani'n codi ar ôl y diwrnod ymadael ar gyfer gweithwyr trawsffiniol sy'n cyflawni gweithgarwch cyflogedig neu hunangyflogedig yn y Deyrnas Unedig.
- Darparu esemptiad rhag codi ffioedd am driniaeth wedi'i chynllunio a ddarperir i ymwelwyr o'r AEE neu'r Swistir, ar y diwrnod ymadael neu ar ôl hynny, sy'n rhan o gwrs o driniaeth a awdurdodwyd cyn y diwrnod ymadael.
- Darparu esemptiad rhag ffioedd ar gyfer ymwelwyr tramor am wasanaethau perthnasol a gwmpesir gan gytundeb dwyochrog ag un o Wladwriaethau'r AEE neu'r Swistir sy'n dod i rym ar y diwrnod ymadael neu ar ôl hynny.
- Dileu cyfeiriadau at yr UE sydd wedi'u cynnwys yn y Prif Reoliadau a fydd, o bosibl, yn anweithredadwy neu'n anghyson ar ôl diwrnod ymadael.

**Rhiant–Ddeddf:** Deddf y Gwasanaeth Iechyd Gwladol (Cymru) 2006

**Fe'u gwnaed ar:** 26 Mehefin 2019

**Fe'u gosodwyd ar:** 28 Mehefin 2019

**Yn dod i rym ar:**



# SL(5)431 – Rheoliadau Traffordd yr M4 (Cyffordd 40 (Tai-bach) i Gyffordd 42 (Earlswood), Castell-nedd Port Talbot) (Terfyn Cyflymder 50 mya) 2019

## Gweithdrefn: Negyddol

---

Mae Gweinidogion Cymru yn gwneud y Rheoliadau hyn sy'n gosod terfyn cyflymder uchaf o 50 milltir yr awr (yn lle'r terfyn cyflymder cyffredinol o 70 milltir yr awr a osodir ar draffyrdd gan Rheoliadau Traffig Traffyrdd (Terfyn Cyflymder) 1974 (O.S. 1974/502)) ar y darnau o draffordd yr M4 a bennir yn yr Atodlen i'r Rheoliadau hyn.

Mae Rheoliadau Traffordd yr M4 (Port Talbot, Castell-nedd Port Talbot) (Terfyn Cyflymder 50 Mya) 2004 (O.S. 2004/2179) (Cy. 208) ("Rheoliadau 2004") wedi eu dirymu gan y Rheoliadau hyn. Bydd Gorchymyn Traffordd yr M4 (Cyffordd 41 (Pentyla) i Gyffordd 42 (Earlswood), Castell-nedd Port Talbot) (Terfyn Cyflymder 50 mya Dros Dro) 2018 (O.S. 2018/746) (Cy. 144) sydd mewn grym yn y lleoliad uchod yn cael ei ddirymu mewn gorchymyn dirymu ar wahân.

Gwnaed Rheoliadau 2004 gan Bennaeth yr Is-adran Gweinyddu Ffyrdd yn enw'r Cynulliad, gan nad oedd gweithdrefn gymwys yn y Cynulliad ar y pryd ar gyfer Rheoliadau lleol o'r fath. Oherwydd hynny, nid oedd yn cael ei gyhoeddi yn y dull arferol. Mae'r drefn bresennol felly yn gwneud y ddeddfwriaeth yn fwy hygyrch.

**Rhiant-Ddeddf:** Deddf Rheoleiddio Traffig Ffyrdd 1984

**Fe'u gwnaed ar:** 02 Gorffennaf 2019

**Fe'u gosodwyd ar:** 03 Gorffennaf 2019

**Yn dod i rym ar:** 24 Gorffennaf 2019





**Cynulliad Cenedlaethol Cymru**

Y Pwyllgor Materion Cyfansoddiadol a Deddfwriaethol